

**GRAD SARAJEVO****Gradsko vijeće**

Na osnovu člana 26. stav 1. tačka 2. Statuta Grada Sarajeva ("Službene novine Kantona Sarajeva", broj 34/08 - Prečišćeni tekst), Gradsko vijeće Grada Sarajeva, na sjednici održanoj 27.11.2019. godine, donosi

**ODLUKU****O SPOMENICIMA OD ZNAČAJA ZA GRAD SARAJEVO****DIO PRVI - OPĆE ODREDBE****Član 1.**

(Predmet Odluke)

- (1) Ovom Odlukom o spomenicima od značaja za Grad Sarajevo (u daljnjem tekstu: Odluka) određuju se kriteriji za utvrđivanje spomenika od značaja za Grad Sarajevo, vrste spomenika, način podnošenja i razmatranja inicijative za podizanje spomenika od značaja za Grad Sarajevo, određivanje lokacije, uslovi i postupak za podizanje spomenika, kao i način čuvanja, održavanja i zaštite spomenika podignutih u skladu sa ovom Odlukom, te nadzor nad primjenom odluke.

**Član 2.**

(Definicija)

- (1) Spomenicima u smislu ove Odluke smatraju se skulpture, biste, spomen-kompleksi odnosno obilježja, spomen-česme, spomen-ploče i fontane koji su svojim sadržajem, estetskim izgledom i funkcionalnošću namijenjeni očuvanju uspomene na historijske događaje i ličnosti (u daljnjem tekstu spomenici),
- (2) Umjetničke skulpture u smislu ove Odluke smatraju se skulpture iznimne kulturno umjetničke vrijednosti, spomen-pokloni iznimne kulturno-umjetničke vrijednosti, odnosno umjetničke skulpture ili obilježja koja se mogu podizati na određene vremenske periode, a koja mogu biti u vlasništvu Grada Sarajeva i kojima može upravljati Grad Sarajevo, (u daljnjem tekstu umjetničke skulpture) obuhvaćene su ovom Odlukom.

**DIO DRUGI - KRITERIJI I POSTUPAK ZA PODIZANJE SPOMENIKA****POGLAVLJE I - KRITERIJI ZA VALORIZACIJU I PODIZANJE SPOMENIKA****Član 3.**

(Kriterij za valorizaciju spomenika)

- (1) **Spomenicima od značaja za Grad Sarajevo** u smislu ove odluke smatraju se:
- a) spomenici kojima se obilježavaju historijski događaji od posebnog značaja za Grad Sarajevo i Bosnu i Hercegovinu, a koji su obilježili bližu i dalju historiju i dali poseban doprinos razvoju i afirmaciji Grada Sarajeva i Bosne i Hercegovine;
  - b) spomenici podignuti u znak sjećanja na osobe koje su svojim djelovanjem dale poseban doprinos razvoju i afirmaciji Grada Sarajeva i Bosne i Hercegovine, te očuvanju civilizacijskih vrijednosti, multietničnosti i posebnosti Grada Sarajeva i Bosne i Hercegovine.
- (2) **Umjetničkim skulpturama** od značaja za Grad Sarajevo u smislu ove Odluke smatraju se instalacije u javnom prostoru koje se mogu ocijeniti kao djela iznimne kulturno-umjetničke vrijednosti.

**Član 4.**

(Podizanje spomenika i umjetničkih skulptura)

- (1) Podizanje spomenika se vrši u skladu sa Elaboratom o mogućim lokacijama za postavljanje spomenika, spomen-obilježja i spomen-ploča na području Grada Sarajeva, a koji su od značaja za Grad Sarajevo (u daljem tekstu: "Elaborat").
- (2) Elaborat usvaja Gradsko vijeće Grada Sarajeva na prijedlog Gradonačelnika.
- (3) Za podizanje umjetničkih skulptura se primjenjuje isti postupak utvrđen ovom Odlukom kao i za podizanje spomenika.

**POGLAVLJE II - PODNOŠENJE I POSTUPANJE PO INICIJATIVI ZA PODIZANJE SPOMENIKA****Član 5.**

(Inicijativa za podizanje spomenika)

- (1) Inicijativu za podizanje spomenika od značaja za Grad Sarajevo mogu podnijeti vijećnici Gradskog vijeća Grada Sarajeva, vijećnici općinskih vijeća općina u sastavu Grada Sarajeva, Gradonačelnik i načelnici općina. Pravna lica i udruženja građana mogu podnijeti inicijativu za podizanje spomenika putem općina.
- (2) Inicijativa mora sadržavati naziv događaja, odnosno ime ličnosti kojima se inicira podizanje spomenika, sa obrazloženjem i prijedlog lokacije za njegovo podizanje.
- (3) Inicijativa se podnosi Gradonačelniku.
- (4) Gradonačelnik putem nadležne službe prosljeđuje inicijativu Komisiji za spomenike Gradskog vijeća Grada Sarajeva.

**Član 6.**

(Komisija za spomenike)

- (1) Komisija za spomenike (u daljem tekstu: Komisija) osniva se posebnom odlukom Gradskog vijeća Grada Sarajeva.
- (2) Komisija ima sedam članova, a sačinjavaju je gradski vijećnici, te ugledni stručnjaci, naučni i javni djelatnici iz predmetne oblasti.
- (3) Komisija vrši valorizaciju događaja, odnosno ličnosti i donosi odluku o tome da li je događaj, odnosno ličnost za koji se inicira podizanje spomenika, od značaja za Grad Sarajevo, a u skladu sa kriterijima iz člana 3. ove Odluke. Za procjenu iznimne vrijednosti umjetničke skulpture Gradonačelnik pribavlja mišljenje Savjeta Gradonačelnika kapacitiranog za davanje ovakvog mišljenja, a po potrebi formira posebno tijelo sastavljeno od kompetentnih vanjskih saradnika.
- (4) Komisija vrši valorizaciju iz stava 3. ovog člana u roku od 60 dana od prijema inicijative.
- (5) Nakon što je Komisija odlučila o tome da se podnesena inicijativa odnosi na podizanje spomenika od značaja za Grad Sarajevo i Bosnu Hercegovinu, prema kriterijima iz člana 3. ove Odluke, Gradonačelnik putem nadležne službe obavještava podnosioca inicijative o valorizaciji Komisije i upućuje podnosiocu inicijative zahtjev da se inicijativa, ukoliko tražena dokumentacija nedostaje i/ili ukoliko je to potrebno, upotpuni sljedećim elementima:
  - a. idejnim rješenjem spomenika
  - b. precizno određenom mikrolokacijom
  - c. podacima o načinu finansiranja podizanja spomenika
  - d. Podnosilac inicijative je, na zahtjev Komisije, dužan upotpuniti podnesenu inicijativu u roku od 60 dana, osim ako za dobivanje idejnog rješenja spomenika nije potrebno provesti javni konkurs, kada se postupak u skladu sa članom 11. stav (3) i članom 12. stav (3) ove Odluke.

- e. Nakon obrade tako kompletirane inicijative, po postupku i na način u skladu sa ovom Odlukom, Gradonačelnik tekst nacrt odluke o podizanju spomenika, upućuje Komisiji koja utvrđuje nacrt odluke i upućuje ga Gradskom vijeću na razmatranje, a poslije provedene javne rasprave, a na osnovu izvještaja o provedenoj javnoj raspravi i teksta prijedloga odluke koji Komisiji dostavlja Gradonačelnik zajedno sa izvještajem o provedenoj javnoj raspravi, Komisija utvrđuje prijedlog odluke i upućuje ga Gradskom vijeću na razmatranje i konačno odlučivanje.
- f. U slučajevima kada Komisija odluči da se inicijativa za podizanje spomenika, ne odnosi na podizanje spomenika prema kriterijima iz člana 3. ove Odluke, odnosno procijeni da spomenik nije od značaja za Grad Sarajevo, Gradonačelnik, putem nadležne službe o tome obavještava podnosioca inicijative, odnosno po potrebi i nadležnu općinu.
- g. U slučaju kada podnosilac inicijative ne izvrši dopunu inicijative u roku propisanom stavom (6) ovog člana, Komisija obustavlja postupak donošenja odluke, o čemu Gradonačelnik putem nadležne službe, obavještava podnosioca inicijative.

### **POGLAVLJE III - PRIMJENA ELABORATA, ODREĐIVANJE LOKACIJA, IDEJNO RJEŠENJE I ODLUKA O PODIZANJU SPOMENIKA**

#### **Odjeljak A. Elaborat i javna debata**

##### **Član 7.**

(Elaborat o mogućim lokacijama za postavljanje spomenika)

- (1) Lokacija za podizanje spomenika se određuje u skladu sa Elaboratom iz člana 4. ove Odluke, uz provođenje postupka primjene Elaborata uređenog ovom Odlukom.

##### **Član 8.**

(Javna debata o lokaciji spomenika)

- (1) Po valorizaciji spomenika kao spomenika od značaja za Grad Sarajevo u odnosu na kriterije iz člana 3. ove odluke, ukoliko ocijeni potrebnim, Gradonačelnik u saradnji sa podnosiocem inicijative, moderira rad javne debate sa ciljem:
  - a) utvrđivanja postojanja i važnost veze historijskog događaja ili ličnosti sa lokacijom na kojoj se inicira podizanje spomenika od značaja za Grad Sarajevo u skladu s Odlukom;
  - b) opredjeljenja o potrebi raspisivanja konkursa radi pribavljanja idejnog rješenja, te
  - c) razmatranja modela finansiranja aktivnosti na pripremi i podizanju spomenika.
- (2) U javnoj debati učestvuju, na poziv Gradonačelnika, subjekti relevantni za tematiku spomenika iz inicijative koja se razmatra, nadležne institucije, akademska zajednica i zainteresirani građani.
- (3) Gradonačelnik izvještaj o provedenoj debati dostavlja Komisiji uz tekst nacrt odluke o podizanju spomenika.

##### **Član 9.**

(Primjena Elaborata)

- (1) Ukoliko se u toku javne debate ustanovi da je historijsku vezu spomenika sa lokacijom na kojoj se inicira podizanje spomenika teško ustanoviti ili ona nije izričito važna, razmatraju se lokacije
- (2) za podizanje spomenika utvrđene u Elaboratu, prioritarno sa prostornog i urbanističkog aspekta.

#### **Odjeljak B. Lokacije za podizanje spomenika**

##### **Član 10.**

(Provjera dostupnosti lokacije)

- (1) U postupku razmatranja inicijative za podizanje spomenika na određenju lokaciji, nadležna služba Gradske uprave, provjerava

- a) je li predložena lokacija za izgradnju spomenika raspoloživa, odnosno da nije na razmatranoj lokaciji izgrađen drugi objekt u skladu sa planskim dokumentom višeg reda donesenim poslije Elaborata, sa kojim, u međuvremenu, Elaborat nije usklađen, te
  - b) je li određenim planskim dokumentom višeg reda, konkretnom lokalitetu ili njegovom bliskom okruženju, promijenjena namjena tako da je u koliziji sa lokacijom za podizanjem spomenika sadržanom u Elaboratu, bilo prostorno, bilo sadržajno.
- Ukoliko izgradnja nije moguća zbog ranijeg zauzimanja ili promijenjene namjene konkretne lokacije kako je to navedeno u stavu 1. ovog člana, odabire se druga lokacija iz Elaborata, po istom postupku.
- Lokacije u Elaboratu se revidiraju najmanje jednom u 10 godina, a po potrebi i ranije.

##### **Član 11.**

(Spomenici od značaja za Grad Sarajevo i Bosnu i Hercegovinu)

- (1) Gradonačelnik i Komisija, u primjeni Elaborata, imaju nadležnost da razmatraju i odabiru lokaciju za koju je u Elaboratu, u "Ličnoj karti spomenika", u rubrici "Lokacije", stavljena oznaka "Bosna i Hercegovina".
- (2) Na lokaciji iz stava 1. ovog člana, mogu se podizati spomenici koji se odnose na događaje, odnosno ličnosti od značaja za Grad Sarajevo i Bosnu i Hercegovinu, u skladu sa kriterijima iz člana 3. ove Odluke, a za čije podizanje se ocijeni da je primjerena lokacija u glavnom gradu.
- (3) Za lokacije iz stava 1. ovog člana, obavezno se raspisuje javni konkurs sa ciljem pribavljanja odgovarajućeg primjerenog spomeničkog ili skulpturalnog rješenja, uz analizu specifičnih urbanističko-arhitektonskih elemenata i okruženja.

##### **Član 12.**

(Spomenici od značaja za Grad Sarajevo)

- (1) Gradonačelnik i Komisija, u primjeni Elaborata, imaju nadležnost da razmatraju i odabiru lokaciju za koju je u Elaboratu, u "Ličnoj karti spomenika", u rubrici "Lokacije", stavljena oznaka "Grad Sarajevo".
- (2) Na lokaciji iz stava 1. ovog člana, može se podizati samo spomenik koji se odnosi na događaje i ličnosti od značaja za Grad Sarajevo, u skladu sa kriterijima iz člana 3. ove Odluke.
- (3) Idejno rješenje spomenika koji se podiže na lokaciji iz stava 1. ovog člana, mora biti usklađeno sa urbanističko-arhitektonskim okruženjem.

##### **Član 13.**

(Spomenici od značaja za gradske općine)

- 1) Općina koja je u sastavu Grada Sarajeva, u primjeni Elaborata ima mogućnost izbora lokacije kojoj je u Elaboratu, u "Ličnoj karti spomenika", u rubrici "Lokacije", stavljena oznaka "općina", a koje se nalaze na teritoriju općine koja podiže spomenik.

#### **Odjeljak C. Lokacije za podizanje spomenika koje nisu predviđene Elaboratom**

##### **Član 14.**

(Spomenici od značaja za Grad Sarajevo i Bosnu i Hercegovinu)

- 1) Ukoliko se ustanovi da je bitna veza spomenika sa lokacijom na kojoj se inicira podizanje konkretnog spomenika, a koja nije predviđena u Elaboratu, Gradonačelnik, putem nadležne gradske službe, pribavlja mišljenje općine na čijoj teritoriji se nalazi lokacija, mišljenje Zavoda za planiranje razvoja Kantona Sarajevo, mišljenje Kantonalnog zavoda za zaštitu kulturno-historijskog i prirodnog naslijeđa ukoliko se radi o lokalitetu pod zaštitom, a u slučaju da se inicira podizanje spomenika na lokaciji koja se nalazi u zoni zaštite nacionalnog spomenika, pribavlja i mišljenje Zavoda za zaštitu spomenika Federacije Bosne i Hercegovine.

- 2) Član 4. stav (1) Odluke se u slučaju iz stava (1) ovog člana, ne primjenjuje.

Član 15.

(Spomenici od značaja za općinu)

- (1) U slučaju prijedloga za podizanje spomenika od značaja za općinu, na lokaciji koja Elaboratom nije predviđena za postavljanje spomenika, pribavlja se mišljenje Zavoda za planiranje razvoja Kantona Sarajevo, mišljenje Kantonalnog zavoda za zaštitu kulturno-historijskog i prirodnog naslijeđa ukoliko se radi o lokalitetu pod zaštitom, a u slučaju da se inicira podizanje spomenika na lokaciji koja se nalazi u zoni zaštite nacionalnog spomenika, pribavlja se i mišljenje Zavoda za zaštitu spomenika Federacije Bosne i Hercegovine.
- (2) Član 4. stav (1) Odluke se u slučaju iz stava (1) ovog člana, ne primjenjuje.

**POGLAVLJE IV - IDEJNO RJEŠENJE ZA PODIZANJE SPOMENIKA**

Član 16.

(Idejno rješenje za spomenike od značaja za Grad Sarajevo i Bosnu i Hercegovinu)

- (1) Po određivanju lokacije za podizanje konkretnog spomenika od značaja za Grada Sarajevo i Bosnu i Hercegovinu, te za podizanje spomenika na svim lokacijama unutar uže gradske jezgre, Gradonačelnik raspisuje konkurs za izbor odgovarajućeg idejnog rješenja spomenika, osim za spomen-ploče.
- (2) Gradonačelnik formira projektni zadatak za izradu idejnog rješenja spomenika.
- (3) Gradonačelnik Grada Sarajeva formira konkursnu komisiju koju čine predstavnik podnosioca inicijative, pomoćnik gradonačelnika Grada Sarajeva koji rukovodi nadležnom službom za upravu, predstavnik Komisije za spomenike Gradskog vijeća Grada Sarajeva, predstavnik nadležne službe općine na čijoj se teritoriji postavlja spomenik, te ovisno o vrsti spomenika, predstavnici Akademije likovnih umjetnosti ili udruženja ULUBIH i ULUPUBIH, Arhitektonskog fakulteta u Sarajevu i/ili Asocijacije arhitekata BiH, Zavoda za zaštitu kulturno-historijskog i prirodnog naslijeđa Kantona Sarajevo, Zavoda za planiranje razvoja Kantona Sarajevo, predstavnici institucija i/ili pojedinaca relevantnih za tematiku spomenika.
- (4) Rješenjem o formiranju konkursne komisije imenuju se članovi komisije, utvrđuje djelokrug komisije, uz obavezu donošenja poslovnika o radu komisije, te se utvrđuje visina naknade za rad članovima komisije, tako da pravo na naknadu ostvaruju svi članovi komisije, osim predstavnika Grada Sarajeva, predstavnika Komisije, predstavnika nadležne službe općine na čijoj se teritoriji postavlja spomen obilježje i predstavnika podnosioca inicijative.
- (5) Konkursna komisija razmatra pristigle prijave na konkurs i predlaže Gradonačelniku rang listu razmatranih idejnih rješenja.
- (6) Gradonačelnik daje saglasnost na izbor idejnog rješenja koje se nalazi na prvom mjestu rang liste koje dostavlja konkursna komisija, kao konačan izbor prijedloga idejnog rješenja - izmjenjena na prijedlog zavoda za spomenike.

Član 17.

(Idejno rješenje za spomenike od značaja za Grad Sarajevo)

- (1) Idejno rješenje za podizanje konkretnog spomenika Gradonačelnik pribavlja putem javnog konkursa, odnosno druge odgovarajuće zakonske mogućnosti.
- (2) Podnosilac inicijative ima mogućnost da dostavi idejno rješenje za podizanje konkretnog spomenika.
- (3) Ukoliko se idejno rješenje pribavlja putem konkursa, formira se konkursna komisija na način kao što je navedeno u članu 16. ove Odluke.
- (4) Za podizanje spomenika unutar uže gradske jezgre obavezno je raspisivanje javnog konkursa - na sugestiju zavoda za spomenike.

Član 18.

(Idejno rješenje za spomenike od značaja za općine Grada Sarajeva)

- (1) Po određivanju lokacije za podizanje konkretnog spomenika od značaja za općinu, općina zajedno sa podnosiocem inicijative pribavlja idejno rješenje, moguće uz raspisivanje javnog ili pozivnog konkursa za izbor odgovarajućeg idejnog rješenja spomenika.
- (2) Za spomenik za koji se inicira podizanje na lokaciji predviđenoj Elaboratom sa oznakom "općina" ili na lokaciji odabranoj u konsultacijama sa nadležnim institucijama, općina pribavlja mišljenje o idejnom rješenju spomenika od Zavoda za planiranje razvoja Kantona Sarajevo, a ukoliko se radi o lokalitetu pod zaštitom i mišljenje Kantonalnog zavoda za zaštitu kulturno-historijskog naslijeđa.

Član 19.

(Spomen - ploča)

- (1) Ukoliko na traženoj lokaciji ne postoje prostorne mogućnosti za postavljanje slobodnostojećeg trodimenzionalnog spomenika, a veza spomenika sa lokacijom je bitna, o mogućnosti postavljanja spomenika u vidu odgovarajuće spomen-ploče, na fasadu arhitektonskih objekata na traženoj lokaciji, Gradonačelnik pribavlja mišljenje općine na čijoj teritoriji se nalazi lokacija, te Zavoda za zaštitu kulturno-historijskog i prirodnog naslijeđa Kantona Sarajevo i/ili Zavoda za planiranje razvoja Kantona Sarajevo, odnosno Zavoda za zaštitu spomenika Federacije Bosne i Hercegovine u skladu sa zakonom.
- (2) Za pribavljanje idejnog rješenja spomen-ploče nije potrebno provoditi konkursnu proceduru.

**DIO TREĆI - ODLUKA O PODIZANJU SPOMENIKA**

Član 20.

(Donošenje odluke o podizanju spomenika)

Odluku o podizanju spomenika od značaja za Grad Sarajevo donosi Gradsko vijeće Grada Sarajeva.

Član 21.

(Priprema odluke o podizanju spomenika i umjetničkih skulptura)

- (1) Po završenom postupku razmatranja inicijative u pogledu preciziranja lokacije i pribavljanja idejnog rješenja, Gradonačelnik upućuje Komisiji na dalje postupanje, tekst nacrtu odluke o podizanju konkretnog spomenika koji obavezno sadrži:
- a) precizno određenu mikro lokaciju za podizanje spomenika,
- b) finansijska sredstava potrebna za podizanje spomenika i način finansiranja,
- c) nosioca realizacije podizanja spomenika.
- (2) Komisija, na osnovu predloženog teksta odluke iz stava 1. ovog člana, utvrđuje nacrt odluke i upućuje ga Gradskom vijeću na razmatranje, a poslije provedene javne rasprave, prema izvještaju o provedenoj javnoj raspravi i teksta prijedloga odluke koje priprema Gradonačelnik, Komisija za spomenike utvrđuje prijedlog odluke i upućuje ga Gradskom vijeću na konačno odlučivanje.

Član 22.

(Primjena odluke o podizanju spomenika i umjetničkih skulptura)

- 1) Podnosilac inicijative je dužan, po stupanju na snagu odluke o podizanju konkretnog spomenika od značaja za Grad Sarajevo, podnijeti zahtjev za izdavanje urbanističke saglasnosti za podizanje spomenika, nadležnom općinskom organu, najkasnije u roku od 90 dana, odnosno podnijeti zahtjev za odobrenje za građenje u roku od 12 mjeseci i o tome istovremeno obavijesti Gradonačelnika.



- 2) Ukoliko Podnosilac inicijative ne izvrši obavezu u rokovima navedenim u stavu 1. ovog člana, Gradonačelnik pokreće proceduru stavljanja van snage odluke Gradskog vijeća o podizanju konkretnog spomenika od značaja za Grad Sarajevo.
- 3) Kada se radi o inicijativama, motivima i potrebama za spomeničkim sadržajima od izuzetnog značaja i oko čijeg podizanja postoji velika mjera koncenzusa javnosti, Gradonačelnik može predložiti Gradskom vijeću da donese Odluku o izmjenama i dopunama Odluke o podizanju konkretnog spomenika u dijelu gdje se definiše Podnosilac, a u smislu da Gradonačelnik, odnosno Gradska uprava, preko svojih službi preuzme obaveze i zadatke podnosioca inicijative, a što se odnosi na slučajeve više sile koji uzrokuju spriječenost podnosioca u ispunjavanju zadataka koji su definisani Nacrtom Odluke.

## Član 23.

(Odluka o promjeni statusa spomenika)

- (1) Inicijativu o promjeni statusa spomenika ili umjetničke skulpture može podnijeti Gradonačelnik ili Gradsko vijeće.
- (2) Gradsko vijeće na prijedlog Komisije za spomenike, donosi odluku o promjeni statusa spomenika ili umjetničke skulpture, kojom se može odlučiti o uklanjanju, premještanju ili prenošenju nadležnosti nad spomenikom ili umjetničkom skulpturom na drugi subjekt.
- (3) Komisija za spomenike utvrđuje prijedlog odluke iz stava (1) ovog člana, po osnovi inicijative Gradonačelnika ili Gradskog vijeća. Gradonačelnik priprema tekst prijedloga odluke o promjeni statusa spomenika.
- (4) Odredbe ove odluke koje se odnose na podizanje spomenika i umjetničkih skulptura, a vezano za određivanje lokacije, primjenjuju se pri odlučivanju o njihovom premještanju.
- (5) Odluka o promjeni statusa konkretnog spomenika ili umjetničke skulpture u zavisnosti od novog statusa spomenika obavezno treba da sadrži:
  - a) precizno određenu mikro lokaciju za premještanje spomenika,
  - b) finansijska sredstva potrebna za realizaciju neophodnih aktivnosti i način finansiranja,
  - c) nosioca realizacije planiranih aktivnosti.

## DIO ČETVRTI - UPRAVLJANJE SPOMENICIMA OD ZNAČAJA ZA GRAD SARAJEVO

## Član 24.

(Čuvanje, održavanje i zaštita spomenika)

- (1) O čuvanju, održavanju i zaštiti spomenika i umjetničkih skulptura obuhvaćenih ovom odlukom, brine se Grad Sarajevo.

## Član 25.

(Registar spomenika i umjetničkih skulptura)

- (1) Gradonačelnik, putem nadležne službe, dužan je ustrojiti i voditi registar spomenika i umjetničkih skulptura od značaja za Grad Sarajevo.
- (2) Grad Sarajevo ima obavezu informisati Kantonalni zavod za zaštitu kulturno-historijskog i prirodnog naslijeđa Kantona Sarajevo o novopodignutom spomeniku zbog ažuriranosti baze podataka o spomenicima koju ova institucija vodi.

## Član 26.

(Programiranje i finansiranje održavanja i podizanja spomenika i umjetničkih skulptura od značaja za Grad Sarajevo)

- (1) Sredstva potrebna za realizaciju ove Odluke planiraju se u Budžetu Grada Sarajeva na posebnim stavkama i to za:
  - tekuće održavanje spomenika i umjetničkih skulptura od značaja za Grad Sarajevo i podizanje spomenika i umjetničkih skulptura od značaja za Grad Sarajevo kojima je Grad Sarajevo investitor.
- (2) Sredstva za tekuće održavanje iz stava (1) ovog člana planiraju se na osnovu godišnjeg Programa tekućeg održavanja

spomenika i umjetničkih skulptura od značaja za Grad Sarajevo, koji donosi Gradonačelnik uz prethodnu pribavljenu saglasnost Komisije za spomenike Gradskog vijeća.

- (3) Sredstva za podizanje spomenika, odnosno umjetničkih skulptura iz stava (1) ovog člana, a koja sadrže i sredstva za uklanjanje, odnosno premještanje spomenika i umjetničkih skulptura, planiraju se na osnovu godišnjeg Programa podizanja spomenika i umjetničkih skulptura od značaja za Grad Sarajevo kojima je Grad Sarajevo investitor.
- (4) Program iz stava (3) ovog člana donosi Gradsko vijeće na prijedlog Gradonačelnika, a zasniva se na inicijativama koje su dobile podršku Gradskog vijeća i za koje je Komisija za spomenike utvrdila da su inicijative za podizanje spomenika i umjetničkih skulptura od značaja za Grad Sarajevo, te uputila Gradonačelniku na obradu s ciljem da Grad Sarajevo bude investitor, kao i po osnovi odluka o promjeni statusa spomenika i umjetničkih skulptura.

## DIO PETI - NADZOR

## Član 27.

(Nadzor)

- (1) Nadzor nad provođenjem ove odluke vrši Gradonačelnik, putem nadležne službe.
- (2) Inspekcijski nadzor u primjeni Odluke vrši Gradska služba za inspekcijski nadzor.
- (3) Nadzor u smislu kaznenih odredbi.

## Član 28.

(Kaznene odredbe)

- (1) Novčanom kaznom u iznosu od 10.000,00 KM će se kazniti za prekršaj pravno lice, ako izvrši postavljanje spomenika suprotno odredbama ove Odluke, dok će odgovorno lice u pravnom licu biti kažnjeno novčanom kaznom u iznosu od 3.000,00 KM.
- (2) Novčanom kaznom u iznosu od 1.000,00 KM do 3.000,00 KM će se kazniti za prekršaj lica, koje izvrši sknavljenje ili oštećenje spomenika.

## DIO ŠESTI - PRELAZNE I ZAVRŠNE ODREDBE

## Član 29.

(Prestanak važenja ranijeg propisa)

- (1) Stupanjem na snagu ove Odluke, prestaje važenje Odluke o spomenicima od značaja za Grad Sarajevo ("Službene novine Kantona Sarajevo", br. 12/11, 21/16, 8/18, 8/19).

## Član 30.

(Stupanje na snagu)

- (1) Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 01-GV-02-1241/19  
27. novembra 2019. godine  
Sarajevo

Predsjedavajući  
Gradskog vijeća  
Dr. Igor Gavrić, s. r.

Na osnovu člana 26. stav 1. tačka 2. i člana 73. Statuta Grada Sarajeva ("Službene novine Kantona Sarajevo", broj 34/08 - prečišćeni tekst), odredaba Odluke o izmjeni Odluke o davanju na korištenje nekretnina Zavoda za platni promet Federacije Bosne i Hercegovine u likvidaciji koje su u vlasništvu Federacije Bosne i Hercegovine V. broj: 1210/2019 od 24.10.2019. godine, Zaključku Vlade Federacije Bosne i Hercegovine V. broj: 1050/2019 od 19.09.2019. godine, Gradsko vijeće Grada Sarajeva, na sjednici održanoj dana 27.11.2019. godine, donijelo je